

# 34

Christoph Blocher en la regenza

\_\_\_\_\_ Tschel di, en december 1999, hai jau scritg or da I 'America ina charta ad Ogi. Jau hai scritg:

\_\_\_\_\_ Stimà sar president da la Confederaziun svizra. Mia dunna ed jau avain ina proposta. Nus vulain abolir tut il cussegl federal. Vul dir che tut ils set scolars da la "classe politique", sco che Ses collega da partida di adina, pon ir ensemen en lur meritada pensiun. Era Vus sar Ogi – che Vus perdunais – pudais sa deditgar en avegnir pli intensivamain al sport. Vus dastgais esser directur da la candidatura per l'olimpiada d'enviern a Lugano.

Jau e mia dunna avain stipulà ina glista cun tut ils successurs, tut ils novs commembers dal cussegl federal. Sco minister da l'intern avain nus previs a Pingu. Quel ha adina ideas uschè originalas en situaziuns delicatas. Nella Martinetti surpiglia il departament da trafic. Ella ha be da sa postar – durant tut la perioda d'uffizi – davant il tunnel dal Gotthard. Ils problems da trafic da la Svizra fissan alura schliads. Christoph Blocher vegn minister da l'exteriur – quel e gea in euro-turbo e porta ina chapellina blaua. La Miss Svizra, Anita Buri, po surpigliar il departament dal militar. Ils umens avessan forsia dapli motivaziun per ir en servezzan. Beni Thurnheer s'occupa da las finanzas. Alura gudagna forsia era il stadi svizzer ina giada la milliun da Benissimo. Derrick e Harry Klein surpiglian il departament da polizia e giustia. Ils quints da telefon fissan magari bunmartgads. E per finir vegn anc Helmut Kohl noss nov president da la Confederaziun. Quel pisera – en il departament d'economia – che tut ils raps van al dretg lieu. Che Kohl ed ils Derricks n'en betg Svizzers, mabain Tudestgs, quai e tuttina. Christoph Blocher n'e era betg in dretg Svizzer, mabain in Svizzer dretg. Ed in summa, per la politica na s'interessa gea gnanc'olma.

\_\_\_\_\_ Ina resposta a mia charta n 'ha Ogi anc betg tramess – donn!

\_\_\_\_\_ Per finir anc insatge auter: Pli gugent Steve Locher a la partenza che Christoph Blocher en la regenza.

\_\_\_\_\_ Cun chars salids Voss Men Caduff

\_\_\_\_\_ In'otra metoda da repartir las sutgas: 4, 11